



湘潭張博篇云戚家畜一貓數年不見其捕一鼠而鼠耗亦絕一日修葺住房其貓所常伏卧之地板下死鼠數百然後知此貓之善於降鼠是卽華潤庭所云貓之捕鼠能聚鼠爲上也

前朝大內貓狗皆有官名食俸中貴養者常呼貓爲老

翁

宋牧仲筠
廊偶筆

明萬歷時御前最重貓其爲上所憐愛及后妃各宮所畜者加至管事職銜且其稱謂更奇牝者曰某了頭牡者曰某小廝若已騶者則呼爲某老爹至進而有名封

直謂之某管事但隨內官數內同領賞賜此不過左貂
輩緣以谿壑然得無似高齊之郡君儀同耶又貓性喜
跳宮中聖盾初誕未長成者間遇其相邁而爭相誘而
嗥往往驚搐成疾其乳母又不欲明言多至不育此皆
內臣親道之者似亦不妄又嘗見內臣家所畜貓其
高大者逾於尋常家犬而犬又貴小種其最小者如波
斯金線之屬反小於貓數倍每包裹置袖中呼之即自
出能如人意聲甚雄般般如豹

野獲編

黃香鐵待詔云明熹宗好貓貓兒房所飼十五成

羣壯者人稱某小厮牝者稱了頭或加職銜稱某
老爺此中官例闕賞見陳棕天啓宮詞注其詩云

紅罽無塵白晝長了頭日日侍君王了頭即指此

昔檀默齋嘗謂袁淑冊封驢爲廬山公豕爲大蘭王此
二畜蠢穢不堪何克當此若貓犬有功於世反無名號
殊爲闕典因戲封貓爲清耗尉犬爲宵警尉甚有韻致
此張訊渡先生述於余者

王朝清雨
窓雜錄

漢按貓犬之封予嘗述之於王蔭齋明府以爲貓
可稱都尉然猶不足以盡其長因加以書城防禦

使兼尙衣監太倉中郎將世襲萬戶侯罔替尤爲
允當於是屬漢代擬誥文韻人韻事不可不記也
王蔭齋名曾樾直隸名孝廉道光丁未權江西長
寧縣篆時漢在其幕中公餘閑話戲談及此明年
蔭齋奉諱北旋予亦南邁今有貓苑之編搜篋中
則代擬之誥稿尙存附錄於此用以博粲承恩閣
閱誰爲出類之材除害閭閻本重非常之績益剛
亦不吐厲而能溫旣夕惕之弗忘白日升之允叶
咨爾貓公系分麟族獨擅雄姿技奏駒場久推靈

捷聰耳目而無有或爽明幹可嘉棄皮毛而不食
其餘廉隅亦飭矧夫陋彼倚門狂吠備言獠犬之
當烹憎其奪路橫傷極謂貪狼之可殺用是賢聲
益著可期耗類永清是故爪牙寄任虎威早樹於
王家搏擊宣勞鼠竊全消於民戶功而不伐賞則
宜優可特封爲清耗都尉書城防禦使兼尙衣監
太倉中郎將世襲萬戶侯罔替於戲高而不危飛
騰常超彼梁棟守而弗失出入肯越乎藩籬卓著
貞恒悉捐逸豫書城永固可長邀一字之褒衣庫

無傷豈枉有三禡之辱况已社清憑崇不待議熏
倉足腐紅奚虞肆劫考績更書夫駕化策勲靡忝
於麟稱允宜眠錫重璫食增鮮膾誕敷賁命勉爾
初心毋蹈屯膏膺茲異數

臨安北內外西巷有賣熟肉翁孫三每出必戒其妻曰
照管貓兒都城並無此種莫令外人聞見或被竊去絕
吾命矣我老無子此與吾子無異也日日申言不已鄉
里數聞其語心竊異之覓一見不可得一日忽拽索出
到門妻急抱回其貓乾紅色尾足毛髮盡然見者無不

駭異孫三歸妻漫藏篋言交至已而浸淫於內侍之
耳卽遣人啖以厚直孫峻拒內侍求之甚力反覆數回
僅許一見旣見益不忍釋竟以錢三百千取去孫流淚
復篋其妻盡日嗟悵內侍得貓喜極欲調馴然後進御
已而色漸淡及半月全成白貓走訪孫氏已徙居矣蓋
用染馬纓法積日爲僞前之告戒篋怒悉姦計也

智囊補

宏治元年潮陽縣舉人蕭瓚家牝犬乳貓夜則同宿一
如其子時瓚兄弟七人友愛故有此徵人以為和氣所

感
潮州府志

萬歷間宮中有鼠大與貓等爲害甚劇遍求佳貓輒被
噉食適異國貢獅貓毛白如雪抱投鼠屋闔其扉潛窺
之貓蹲良久鼠逡巡自穴中出見貓怒奔之貓避登几
上鼠亦登貓則躍下如此往復不啻百次衆咸謂貓怯
旣而鼠跳擲漸遲蹲地少休貓卽疾下爪掬頂毛口齧
首領輾轉爭持間貓聲嗚嗚鼠聲啾啾啓扉急視則鼠
首已嚼碎矣然後知貓之避非怯也待其情也彼出則
歸彼歸則復用此智耳

聊齋誌異

鹽城令張雲在任養一貓甚喜及行取御史帶之同行
至一察院棄之鬼魅人不敢入雲必進宿夜二鼓有白
衣人向張求甯被貓一口咬死視之乃一白鼠怪遂絕

堅瓠集

陸墓一民負官租空室出避家獨一貓催租者持去賣
於閭門徽鋪徽客頗愛玩之已年餘民過其地人叢雜
中貓忽躍入其懷爲鋪中見奪之而去貓輒悲鳴顧視
不已民夜卧舟中聞板上有聲視之貓也口銜一綾幌
幌內有銀五兩餘民貧甚得銀大喜明晨見有賣魚者
買魚飼之飼不已貓遂傷腹死民哀而埋之

堅瓠集

陳笙陔云杭州城內金某素貧其家所養貓一日忽啣龍鳳釵一對來明珠滿綴價值千餘緡以作本質遷家道日盛十餘年間竟成巨富其老母愛惜此貓無殊珍寶另建一樓及床帳居之凡有携貓求售必如值收買積數百頭餵養婢僕亦數人貓有死者皆塚而瘞之至今不衰此乾隆季年間事杭人蓋無不知之者

嘉慶己卯台州太平縣船戶丁姓泊舟沙頭因貓失水下沙救之脚踏一物檢之則一小木匣有銀

百餘兩而貓竟淹斃焉

漢自記

漢按貓馭金寶使主人發家雖貓之義亦由主人有德以應之但陸墓之貓享報未久輒以傷食而亡以視金姓貓福祿相去何如然而兩家之報德酬庸可謂不遺餘力若船戶之貓真不幸矣

畢怡安小姨子愛貓一日席上行酒令傳花以貓叫聲飲酒爲度每巡至怡安貓必叫怡安不勝酒創疑甚察之則知小姨子故戲弄之凡花傳至怡安輒暗招貓一指使叫云

聊齋誌異

金陵閻右子蕩覆先業不勝逋責決意自盡一日市酒
肴與妻示決夫妻對泣不忍飲食遂相與縊焉家有貓
哀鳴躑躅其肴在案不顧也數日不食死

奕賢編

有李侍郎從苗驢携一苗婆歸年久老病常伏卧嘗養
一貓酷愛之眠食必共其時里中傳有夜星子之怪迷
惑小兒得驚痼之疾遠近惶惶一日有巫姑云能治之
乃製桃弓柳箭繫以長絲伺夜星子乘騎過輒射焉絲
隨箭去遣人跡之正落某侍郎家忽婢子報老苗婆背
上中箭視之已惛然而所畜之貓尚伏跨下然後知老

苗婆挾術爲祟而常以貓爲坐騎也

夜譚隨錄

江寧王御史父某有老妾年七十餘畜十三貓愛如兒
子各有乳名呼之卽至乾隆己酉老奶奶亡十三貓繞
棺哀鳴餵以魚殮流淚不食餓三日竟同死

子不語

沂州多虎陝人焦奇寓於沂素神勇入山遇虎輒手格
斃之有欽其勇設筵款之焦乃述其生平縛虎狀意氣
自豪倏一貓登筵攫食主人曰鄰家孽畜可厭乃爾無
何貓又來焦奮拳擊之肴核盡傾碎而貓已躍伏窗隅
焦怒逐擊之窗櫺亦裂貓一躍登屋角目眈眈視焦焦

愈怒張臂作擒縛狀而貓嗥然一聲過鄰墻而去主人
撫掌笑焦大慙而退夫能縛虎而不能縛貓豈真大敵
勇小敵怯哉 諧鐸

一家有巨鼠爲害諸貓皆爲所斃後西賈持一貓至索
五十金包可除鼠因買置倉中鼠至貓匿身於穀僅露
其首鼠過其前初若不見者俟鼠稍倦乃突出銜之互
相持日許鼠竟斃焉貓亦力盡而死稱鼠重三十觔 新齊諧

閩中其夫人喜食貓得貓則先貯石灰於罌投貓於內
而灌以沸湯貓爲灰氣所蝕毛盡脫不煩搨治血盡歸

於臟腑肉白瑩如玉云味勝雞雛十倍也日日張網設
機所捕殺無算後夫人病危啾啾作貓聲越十餘日乃

死 閱微草堂筆記

天門蔣丹林都憲京寓有子母貓依依几席前每日必
俟母貓先食畢而後食家信中因偶及之時都憲爲奉
天府丞其母尚在都憲常殷慕念人以爲孝感所致都
憲乃感嘆作貓侍母食歌二章一時瀋陽同寅皆詠其

事 蔣笙咳殿撰父丹林自記年譜註

鄒泰和學士有愛貓之癖每宴客召貓與孫側坐賜孫

肉一片必賜貓一片督學河南按臨商邱失一貓嚴檄督縣捕尋令苦其煩則以印文覆之有云遣役挨民戶搜查憲貓無獲

墮園詩話

漢按古今名賢有貓癖者多矣若昔之張大夫今之鄒學士之好貓則尤酷爾近年玉環廳某司馬有八貓皆純白色號八白常用紫竹稀眼櫃籠之分四層每層居二貓行動不分遠近必携以從此亦可謂酷於好矣

劉少塗云姚伯昂副憲元之養一黑貓形相如虎甚愛之親爲繪於軸余於公京邸中見之覺神氣如生副憲固精於繪事也

陶文伯云畫家有九九消寒圖豹隱紀談載石湖居士戲用鄉語云八九七十二貓兒尋陰地又云俗以事不盡善者謂之三脚貓嘉靖間南京神樂觀道士袁素居果有一枚極善捕鼠而走不成步循簷上壁如飛也見七修彙藁

又云元新官出京有應盤纏者同去就與管事謂之貓兒頭見七修類稿此卽今之所謂帶肚者也

劉月農巡尹云山東臨清州產貓形色豐美可珍
惟耽慵逸不能捕鼠故彼中人以男子虛有其表
而無才能者呼之爲臨清貓

合肥龔芝麓宗伯所寵顧夫人名媚性愛狸奴有字烏
員者日於花欄繡榻間徘徊撫翫珍重之意踰於掌珠
飼以精粲嘉魚過饜而斃夫人惋悒累日至於輟膳宗
伯特以沉香斲棺瘞之延十二女僧建道場三晝夜

樵觚
曠

江西崇仁縣沈公側室嘗養貓數十隻各色咸備

繫以小鈴羣貓聚戲則琅琅有聲每日有貓料一
分開銷沈公嘉慶拔貢名棠

劉庾卿先生 華杲云俞青士之母好貓常畜百餘
隻雇一老嫗專事餵養閨房之內枕邊几上鏡臺
衣桁之間無處非貓也青士暨其尊公之幕囊宦
囊每歲爲貓料所銷誠不少也

吳雲帆太守云高太夫人係穎樓先生正室小樓
觀察之母也爲浙中閨秀頗好貓嘗搜貓典著有
銜蟬小錄行於世

夫人名蕙宇秀芬會稽
孫姓著有貽硯齋詩集

漢按貓之貽愛於閨閣者有如此以視前篇所載
 李中丞孫閩督兩閩媛之所好尤為奇僻然終不
 若高太夫人之好且為著書以傳斯真清雅惜此
 銜蟬小錄一時覓購弗獲無從採厥緒餘光我陋
 簡孫子然云夫人有詠貓句云一生惟惡
 鼠每飯不忘魚子然名仲安夫人族弟

品藻

蠢動雜生之中有一物能得名賢嘆賞詞人題詠
 則其為生也榮矣然非有德性異能豈易致哉古
 今來品題文藻旁及於貓者匪少蓋貓固有德性

異能也有修獲此鳥得不為貓榮輯品藻

詩經有貓有虎

莊子獨不見夫貓性乎卑身而伏以俟邀者原注邀
 邀遊也東

西跳梁不避高下淵鑿類函

又騏驥驂騑一日千里捕鼠不如狸狴言殊技也

尹文子使牛捕鼠不如狸狴之捷

史記東方朔傳騏驎騏驎飛兔騏驎天下之良馬也將
 以捕鼠不如跛貓

淮南子審毫釐之計者必遺天下之大數不失小物之

選者惑於大事譬猶狸之不可使搏
鼠也

八紘譯史高昌國不朝貢唐使人責之國王曰鷹飛於
天雉竄於蒿貓游於室鼠安於穴各得其所豈不快哉
漢按此與朝野僉載所云縛虎與貓終無脫日其
境界舒結不同迥然矣

說苑使騏驎捕鼠不如百錢之狸

唐崔日用臺中詞曰臺中鼠子直須語信足跳梁上壁

龔信翻燈脂澤明五還來齧帶報韓三莫浪語直王相

大家必若賜金龜賣却貓兒相報賞

漢按詩序崔爲御史中丞賜紫未得佩魚嘗因宴
撰詞云云中宗卽以金魚賜焉

黃香鐵待詔云唐盧延讓業詩二十五舉方登一
第有餓貓臨鼠穴饞犬舐魚砧句爲成中令泐見
賞又有栗爆燒氈破貓跳觸鼎翻之句爲王先王
建所賞嘗謂人曰生平投謁公卿不意得力於貓
兒狗子也

漢按唐人詠貓詩甚少胡知鹺笛灣云路德延小

兒詩貓子綵絲牽又元稹江邊詩停潦魚招獺空
倉鼠敵貓此又盧延讓貓詩之嚙矢也

黃山谷謝周元之送貓詩養得貓奴立戰功將軍細柳
有家風一簞未免魚餐薄四壁常令鼠穴空

漢按陸放翁云先君嘗讀山谷貓詩而嘆其妙

羅大經貓詩陋室偏遭黠鼠欺狸奴雖小策勳奇扼喉
莫謂無遺力應記當年骨醉時

張無盡貓詩白玉狻猊藉錦茵寫經河上淨名軒吾方
大謬求前定爾亦何知不少喧出沒任從倉內鼠鑽窺

甯似檻中猿高眠永日長相對更爲冬裘共足温

林希逸戲號騏驎貓詩道汝含蟬實負名甘眠晝夜寂
無聲不曾捕鼠只看鼠莫是麒麟誤託生

金國李純甫貓飲酒詩枯腸痛飲如犀首竒骨當封似
虎頭嘗笑廟謨空食肉何如天隱且糟邱書生幸免翻
盆惱老婢仍無觸鼎憂只向北門長卧護也應消得醉
鄉侯

委巷叢談古人詠貓絕句甚多而用意各別黃山谷乞
貓詩云秋來鼠輩欺貓死窺甕翻盆攪夜眠聞道狸奴

將數子買魚穿柳聘啣蟬喻小人得志冀用君子之意
劉子亨云口角風來薄荷香綠陰庭院醉斜陽向人只
作猙獰勢不啻黃昏鼠輩忙語涉訕刺劉潛夫云古人
養客乏車魚今爾何功客不如食有溪魚眠有毯忍教
鼠齧案頭書語稍含蓄而督責亦露陸務觀云裏鹽迎
得小狸奴盡護山房萬卷書慙愧家貧策勲薄寒無氈
坐食無魚庶乎厚施薄責而報者自愧惟劉伯溫云碧
眼烏圓食有魚仰看蝴蝶坐階除春風蕩漾吹花影一
任人閒鼠化鴛真豁達含宏法禁不施而奸宄自化信
乎王佐才也

乎王佐才也

全浙詩話

林逋貓詩纖鉤時得小溪魚飽卧花陰興有餘自是鼠
嫌貧不到莫慙尸素在吾廬

漢按全浙詩話引屠隆珂雪齋外集以此詩爲史
彌遠題黃荃畫幀其畫則山丹下卧一貓也 予初
錄而讀之輒覺口吻不類蓋史權相也何有鼠嫌
貧不到之語屬之和靖則情神逼肖且史亦才士
何用盜詩以見古今題畫之作多不足特而鉛槧
家誠不可以不考也

蔡天啟乞貓詩厨廩空虛鼠亦飢終宵敲齧近燈帷腐
儒生計惟黃卷乞取銜蟬與護持

王良臣題畫貓云三生白老與烏圓又現吳生小筆前
乞與王家禳鼠禍莫教虛費買魚錢

柳貫題睡貓圖云花陰閑卧小於菟堂上矚瑜錦繡鋪
放下珠簾春不管隔籠鸚鵡喚狸奴

元好問題醉貓圖云窟邊癡坐費工夫倒輓橫眠却自
如料得先師曾細看牡丹花下日斜初又飲罷雞蘇樂
有餘花陰真是小華胥但教殺鼠如山了四脚撩天却

任渠

張思廉作縛虎行白門吊呂布詩捽虎腦截虎爪眼視

虎如貓小

瞿佑歸
田詩話

李璜以二貓送友人詩錄一銜蟬毛色白勝酥搦絮堆
綿亦不如老病毗耶須減口從今休嘆食無魚

文徵明乞貓詩珍重從君乞小狸女郎先已辦矚瑜自
緣夜榻思高枕端要山齋護舊書遣聘且將鹽裹筭策
勲莫道食無魚花陰滿地春堪戲正是蠶眠二月餘

詩選

張劬懶貓詩
豢養空勤費
夜呼性慵柰
像主人何鬚
燃爨穴防寒
早日送跳梁
戒殺多食少
魚腥春悶悶
眠殘花影雪
皤皤長卿四
壁雖如水誰
管偷詩物似
梭

全上

按隨園詩話
武林女士王
樛影懶貓詩
云山齋空
豢小狸奴性
懶應慙守敝
廬深夜持齋
聲寂寂寒天
媚竈睡遠遠
花陰滿地閑
追蝶溪水當
門食有魚賴
是鼠嫌貧不
至不然誰護
五車書

姚之駟詠貓
五言排律云
舊讀迎貓禮
無教忽百錢
似人愁白老
重爾號烏圓
靈豈蕭妃化
名嗤義府傳
戲羣

藏綠帳分列
坐青氈張目
俄如線垂頭
恐裂鞭害苗
旌見食瓦乳
見能賢修職
辭仁者爲威
故赫然狸奴
方欲戰鼠輩
敢同眠竺國
元依佛天壇
已喚仙花陰
無飽卧寄語
聘銜蟬

袁子才謝尹
望山相國贈
白貓詩狸奴
真箇賜貧官
惹得羣姬置
膝看鼠避早
知來處貴魚
香頗覺進門
歡果然絳帳
溫存久不比
幽蘭付侍難

公先賜蘭已萎

寄語相公休

念舊年年書
札報平安

王笠舫衍梅
貓鬼詩云隋
文下詔搜蠱
毒獨孤陀誅
母

高族助鬼爲虐徐阿尼如養烏鬼家祭之修仙不隨燕
真去成精却伴張搏嬉又貓鬼圖詩紙灰圍作蝴蝶戲
藥汁舐作魚腥吞

漢按笠舫山陰人道光年以進士令廣西有綠雪
堂集

端木鶴田

國瑚

詩云玉面狸兒妖似姝

太鶴山房集

朱聯芝貓贊云碩鼠碩鼠無食我黍王之爪牙有貓有
虎

漢按朱烽字煉之温之永嘉場人本名聯芝有學
有行浮沉鄉里而終著有甌中紀俗詩道光辛卯
年卒蓋眇一目而能視者也

朱聯芝甌中清明紀俗詩女貓男犬賤稱名雜養貪教
易長成圈頸一般新柳綠今朝佳節正清明

注見上

裘子鶴參軍云古今詠貓詩頗多貓之畏寒貪睡
尤爲詩人作口實如張無盡之更爲冬裘共足温
又高眠日永長相對劉仲尹之天氣稍寒吾不出
攉瑜分坐與狸奴林逋之飽卧花陰興有餘柳道
傳之花陰閑卧小於菟與前明高啟之花陰猶卧

日初高 國朝女史表宜之之亂書常被懶貓眠
等句確爲狸奴寫照若盧延讓之飢貓臨鼠穴則
寫其神情也蘇玉局之亡貓鼠益豐則寫其功用
也魯星村之貓捧落花戲則寫其韻致也至於劉
克莊之詠貓捕燕云文彩如彪胆智飛畫堂巧伺
燕兒微是又有感而云然耶

陶潔甫云楊光呂句云桃花林裏飛雲母柳樹陰
中睡雪姑是亦睡貓之一證光昌 國朝湖南人
著有插花窻集

余藍鄉云吾鄉史半樓有貓起被餘温之句時人
呼爲史貓史謂李林甫以柔害物故不理人口今
若此毋乃不雅馴乎余解之曰崔鴛鴦鄭鷓鴣尙
矣然不又有梅河豚乎河豚猶可奚有於貓史乃
悅

余舊有詠貓一絕或謂此爲懷才之士不能棄暗
投明設說其知余哉詩云驅除鼠耗平生志何必
爭言豢養恩大用不能成虎變空撐牙爪向黃昏

漢自
記

漢接近日相傳一儒士詠貓句云好魚性與大賢
同是則硬拉貓入道學矣良堪捧腹

何夢瑤貓詞調寄南浦金鎖倦桃笙向闌干起聽秋虫
宵語楊子可曾過空誇說蕭寺錦衾吟苦蠶眠二月裹
鹽曾記新迎汝孤負銜蟬名字好只解朶頤鸚鵡分
明檀箇麒麟問今日何多逢人呼汝莫更觸璃屏西來
久往事不堪重數憑誰好手繪來雙線花陰午休道金
睛消不得可也鬪如虓虎

吳石華調寄雪獅兒詠貓有序錢葆芬有雪獅兒詠貓
詞竹垞樊榭穀人並和之引徵故實各不相襲後有作
者難爲繼矣余則全用白描亦擊虛之一法也歟詞曰
江茗吳鹽聘得狸奴嬌慵不勝正牡丹花影醉餘午倦
茶蘼架底睡穩春晴淺碧房櫳褪紅時候燕燕歸來還
誤驚伸腰嬾過水晶簾外一兩三聲休教劃損苔青
只繞在牆陰自在行更圓睛閃閃癡看蛺蝶迴廊悄悄
戲撲蜻蜓蹴果纔間無魚慣訴宛轉裊邊過一生新寒
夜伴薰籠斜倚坐到天明

明胡侍罵貓文曰家有白雄雞畜之久矣乃者棲於樹

顛而橫遭貓啗乃呼貓俾前而罵之日咄汝貓汝無他
職職於捕鼠以茲大蜡古也迎汝不鼠之捕日職不舉
而又司晨之禽焉是食計汝之罪匪直不職而已也咄
汝貓相鼠有類實繁厥徒或登承塵或撼戶樞或緣榻
蕩几或踰罇舐盃或覆奩軋積或齧圖褫書汝於是時
儻伺須臾卽不踰房闥而汝之腹以飫人之害以除矣
其或不然則但據地長號咆哮噫鳴雖不鼠輩之克殄
而聲之所懼鮮不縮且逋矣而寂不汝聞而宵焉其徂
吾不意窺高乘虛越垣歷厨緣幹超枝攀柯摧芻而勞
苦於一雞之圖鼠爲人害汝則保之雞具五德汝則屠
之鼠也奚幸雞也奚幸雖則汝有不若汝無無汝則鼠
之害不益於今而雞之禍吾知免夫

淵鑒類函

楊夔畜貓說敬亭叟之家毒於鼠暴乃賂於捕野者俾
求狸之子必銳於家畜數日而獲諸柞逾得駿飾茵以
棲給鱗以茹撫育之如字諸子其攫生捕飛舉無不捷
鼠懾而殄影

毛序始貓彈鼠文臣貓言臣以賁皇之同姓爲章惇之
後身蒙破私恩獲居禁近鼯睡卧榻之側獨肯見容高

踞華屋之巔初不爲怪甚且引登席上授置臺中食必
分肥坐或加膝搏擊斃能言之鳥竟兔詆訶盤旋亂將
覆之甚輒承嘉悅凡諸異數超越同儕臣何敢辭口舌
之勞致有負爪牙之任故常效張湯之磔不欲以義府
之柔務俾么麼之黨類盡除方保公家之器物無損豈
彼自務五技訖持兩端噴噴者不厭煩訛訛焉且惑聽
臣請暴其鬼蜮之狀絕此侏儻之聲謹按搜粟都尉兼
掠剽使襲封同穴侯鼠子本係小醜之尤冒稱諸虫之
老於辰支雖居首在物類爲最微賦形旣消沮不颺稟
性復狡獪莫比光天化日之下暫爾潛踪暗室屋漏之
中公然逞惡營窟穴以藏匿時爲兔脫之謀畏首尾而
伏行更甚狗偷之態漫云有體誰謂無牙速訟遂已穿
墉鑽隙何曾忘壁甚至傷犧牛之角不顧小郊學城
之奸遽思憑社糞污江密實助黃門之譖看齒嚙馬鞍
幸賴蒼舒之善解尤可耻者從乞兒以遊戲都市巧取
金錢見士人而拱揖庭堦故爲妖妄或渡河而踐尾奚
堪侶江渚之魚蝦至墜地而屠傷詎能及淮南之雞犬
縱教幻化誰復責爲其肝相彼貪饕養何可時滿其腹惡

難悉數罪不容誅非斷以老吏之獄辭曷殲夫若輩之族屬是吏食苗食黍終致嘆於魏風而在厠在倉恒興嗟於秦相也伏惟箝斯甘口燭其黠心勅付臣貓追捕如律庶皇甫擊楊廢之首譴責無逃蕭妃扼武墜之喉報施不爽臣愚莽干冒威嚴仰候指揮制曰爾貓名雖不列地支種實傳來天竺念爾祖崇祀於八蜡既與虎而同迎乃嗣孫舊竄於三危嘗以獅而爲號惟茲鼠耗叵耐鴟張孰曰苗頑正資鷗逐而昨暫出彼卽肆凶窺甕翻床任疾呼而不止嚙書遺矢欲安寢而無從爾無

忌器不投定須聞聲卽捕尙防抱頭而竄勿容泣血以思用假便宜怡共常職

堅瓠集

松陵朱長孺

鶴齡

有貓說借貪貓以喻墨吏亦有激之

言說曰余家多鼠患藏書每被嚙蝕隣家有貓乞得之形魁然大爪牙甚銛始至羣鼠屏息穴中私喜鼠患自此弭矣迨月餘患復作終夜咋啞有聲余怪而視之則貓與鼠比同寢處若倡和然調其故貓性貪嗜鮑魚腥中厨所庖見必竊食鼠覺其然凡貓之所嗜鼠必預儲以遺之貓啗而德之遂一任所爲鼠始以形之大也畏

貓既以所嗜嘗貓終則狎貓豢貓利有貓其出而爲患也益無忌余乃嘆曰甚哉貪之毒也使貓無所竊鼠其敢嘗之耶貓既先鼠爲竊其能禁鼠之羣竊耶畜貓本以捕鼠而今反以導鼠且昵之爲一是鼠魁也曷若去鼠魁而羣鼠之患猶或少弭耶乃命童子鎖其項繫其足數而搏之沉之於交衢之溷

全上

黃之駿討貓檄曰捕鼠將佛奴者性成巽懦貌託仁慈學雪衣娘之誦經冒尾君子之守矩花陰晝懶不管翻盆竹簟宵慵由他鑿壁甚至呼朋引類九子環魔母之

宮疊背登有六賊戲彌陀之座而猶似老僧入定不見不聞傀儻登場無聲無臭優柔寡斷姑息養奸遂占滅鼻之凶反中磨牙之毒閻羅怕鬼掃盡威風大將怯兵喪其紀律自甘唾面實爲縱惡之尤誰生厲階盡出沽名之輩是用排楚人犬牙之陣整蔡州騾子之軍佐以牛箠加之馬索輕則同於執豕重則等於鞭羊懸諸狐首竿頭留作前車之鑑縛向麒麟楨上且觀後效之圖共奮虎威勿教兔脫

鐸曰昔萬壽寺彬師以見鼠不捕爲仁羣謂其誑語而

不知實佛門法也若儒生一行作吏以鋤惡扶良爲要
乃食君之祿沽已之名養邑之奸爲民之害如佛奴者
佛門之所必宥王法之所必誅者矣

諧鐸

義貓記云山右富人所畜之貓形異而靈且義其睛金
其爪碧其頂朱其尾黑其毛白如雪富人畜之珍甚里
有貴人子見而愛之以駿馬易不與以愛妾換不與以
千金購不與陷之盜破其家亦不與因携貓逃至廣陵
依於巨富家亦愛其貓百計求之不得以鳩酒毒之其
貓與人不離左右鳩酒甫斟貓卽傾之再斟再傾如是

者三富人覺而同貓宵遁遇一故人匿於舟後渡黃河
失足溺水貓見主人墮河叫呼跳號撈救不及貓亦投
水與波俱汨是夕故人夢見富人云我與貓不死俱在
天妃宮中天妃水神也故人明日謁天妃宮見富人屍
與貓俱在神廡下買棺瘞之埋其貓於側嗚呼蟲魚禽
獸或報恩於生前或殉死於身後如毛寶之白龜思邈
之青蛇袁家兒之大獠犬楚重瞳之烏騅馬指不勝屈
若貓之三覆鳩酒何其靈呼救不得狗之以死何其義
又豈畜類中所多見者耶然其人以愛貓故被禍破家

流離異域復遭鳩毒非貓之幾先有以傾覆之其不死於毒者幾希矣及主人失足河流跳叫求援得相從於洪波之中以報主人珍愛之恩以視夫爲人臣妾患至而不能捍臨難而不能決者其可媿也夫其可媿也夫

徐岳見聞錄並見

虞初新志說鈴

張正宣貓賦云貓之爲獸有獨異焉食必鮮魚卧必暖擅上竈突兮不之怪登床席兮無或嫌恒主人之是戀更女子之見憐彼有位者仁民且豢養之兼及在吾儕爲愛物豈嗜好之多偏是故張大夫不辭貓精之貽號

而童夫人肯使獅貓之亡旃

王朝清雨
憲雜錄

趙古農迎貓制鼠說粵人有患鼠者思以治之而未得其術也適客從外至談及鼠患客曰是非貓不爲功主人曰顧安所得貓乎子盍爲我穿柳聘之客唯唯而退明日果迎貓來主人深喜謝客爰命家人貯紗帷內席以毛毯飯以溪魚日省視之惟恐逆其意者噫主人可謂厚遇此貓矣然貓亦竊解人意花陰飽卧時作虎威聲頻喊露是夜羣鼠首兩端而不敢出也主人舉家咸慰以爲貓之爲功大矣亡何有鼠之黠者挑羣鼠而起

伺貓不及見處唧唧作聲久之翻盆窺壁鼯者碩者咸集一室有舞於門者有拱立而拜揖者更有交足於頸跳擲者甚則晝累累與人並行夜則竊齧鬪暴其聲萬狀熏之不可掘之不得投之而忌乎器貓怒欲齧之或反爲鼠所齧於是家人咸咎貓之無能致見晒於五德貓鬱鬱不樂實亦不解鼠何以至此且技之絀於鼠也因鳩羣鼠切責之復理論之并告以主人厚遇之意而羣鼠無忌如故由是貓更恚懣不已日嗚呼鼠之冥頑不靈恃其五技殆有甚於鄰鼠也予烏能忍與之同眠乎無寧使人謂我見幾而作而謂我尸位而素餐可乎未幾客復來主人具告之故客若有所失謂主人日子知夫貓乎系本西番昔爲使臣上貢道經莊浪驛或試以鐵籠納空室中詰朝起視數十羣鼠竄伏籠外凡所至數里無敢咆哮者茲固若此哉主人聞之亦遂止家人之咎貓者而貓復留

說者曰貓則良矣如黠鼠何世有食人之食而不忠其事者過無可辭然食人之食欲忠其事而未由者咎誰任哉伸尼曰吾未如之何也已貓於鼠又何難焉

漢按趙古農番禺人爲粵東老幕友也此篇爲表
子鶴參軍抄送其所措詞大有寓意故特錄之

補

敬亭叟家毒於鼠暴穿繡穴墉室無全宇咋啣筐篋帑
無完物及賂於捕野者俾求狸之子必銳於家蓄數日
而獲諸汴逾得駿飾以棲給鱗以茹之撫育之厚如子
諸子其攫生搏飛舉無不捷鼠懾而殒影暴腥露羶縱
橫莫犯矣然其野心常思逸於外岡以育爲懷一旦急
其繼踰垣越宇倏不知所逝叟惋且惜涉旬不弭叩農

子聞之曰野性匪馴育而靡恩非獨狸然人亦有旃梁
武於侯景寵非不深矣劉琨於疋殫情非不至矣旣負
其誠復反厥噬嗚呼非所蓄而蓄孰有不叛哉紹聖二
年九月黃庭堅書 黃魯直蓄狸說

漢按山谷茲帖固當首列乃書成後丁雨生始爲
余言因寓書周緩齊厚躬從澄海張浦雲明府邦
泰處抄至亟爲補入惟中如繡汴殒岡殫諸字可
解不可解若汴疑忤字殒俗殄字岡卽岡字殫或
謂殒字之訛茲悉仍其原識以俟考

大蘭王朱相者頗好客鹿馬猴狗俱在門下而鼠爲多一日有薦貓至頗佳然陰爲鼠所忌貓初不知也顧必思有以中傷之以鹿馬持正不阿知不可動乃嗾猴狗讒之貓無失德猴狗不能爲害王有子長曰象仲曰兔兔者爲其形似而言性頗佻鼠輩欲假兔以行其計會王改封遷藩乃遂以貓搏兔言於王王初弗聽無如鼠輩譖之力王乃去貓鹿馬聞之嘆曰貓非獅何搏兔之有輕聽而去賢何王不察之甚久之王亦浸有所聞頗自悔然而羣鼠之計已行相與於窟穴中竊笑王愚矣

先是有善相者謂王形蠢惡後必遭屠未幾流寇亂起王果遇難羣鼠遂分其貲糧而散

焚椒餘話

漢按此節或謂指福藩而言然無可考但聽小人之讒而逐賢士甚至甘以穢名加之親子而不恤今日士大夫之如大蘭王者不少也言之殊不值一噓

含毛國在震旦之南衣冠異而制度同取士有丙科丁科猶中國之有甲乙科也有臧居子者乳名麒麟貓丙科出身曾充掄材使因事降爲郡將一日奉命鹵州勾

當公事咸謂其才望重莫不思一瞻丰采及旣戾止當
事大夫供張惟謹論者謂臧居子茲來必有經濟之談
必有文章之會否則亦必有詩歌留題爲斯邦大雅之
資居數月乃寂然無所聞未幾聞有郵亭風月之狎繼
聞沉湎於酒色矣而且於纏頭費甚吝妓人薄之復有
使氣作踐之舉於是譏誚起而笑罵盈道路矣論者復
謂王朝所稱有才望者大抵如斯耶抑門祚官方之玷
皆可不足恤耶抑天地氣運就衰例生此敗類耶議論
甚不一已而又皆寂然矣似以若而人者有不屑譏誚
笑罵議論者也然而時聞君子有太息聲

宮朝睹麒麟
貓說

盧胡叟曰爲麟使人瞻仰爲貓使人取用若麒麟貓者
適足令人齒冷况又有穢行乎所謂天地衰氣使然例
生敗類似或不誣烏得不爲太息

漢按右二篇與山谷蓄狸說皆是因小見大之文
又按富貴不淫稱之大丈夫若富貴而以致君澤
民爲念國爾忘家非止富貴不淫而已直可以聖
賢稱之也然有此作用方可謂爲不負天地不負
君父及不負所學若而人者豈不令薄海人民辦

香千載也乎

頃者得無名氏寶貓說頗有機趣亦因小見大之
文足以諷世亟爲補入俾廣見聞其詞曰

里有得貓於都會者體偉而毛澤頸繫鈴尾拖綵
步武從容見者咸悅之以爲必善捕鼠也故食鮮
眠暖優以待之且呼之爲寶貓詎養數月鼠患依
然又數月則愈熾焉始則以其慵於捕徐察之竟
無能捕其家舊有貓不甚肥澤捕鼠頗勤呼爲樸
子逸去幾半載主人於是復求而獲之已而鼠患

遂息且見樸子漸與寶貓狎一鳴一躍若有所獻
納而寶貓絕不之顧且時作威狀拒之樸子旋退
去索然自處主人因而私察寶貓常高踞屋脊非
撲蝶則捕蟬或雌雄相追逐有餌以魚與肉則伏
而大嚼旣屢飫即酣睡焉主人爲之喟然長歎乃
戲繫大鼠十數環擲其卧窩羣相撐拒啾唧寶貓
見之大驚而逸遂不知所之桴浮子曰無技能而
享高厚貪野食而耽惰淫置主人事於不顧有獻
納而不知受甚至見羣大鼠而驚逸若斯寶貓固

不復知有羞恥事然不審於衾影中或稍有愧於心否嗚呼鼠患熾至於不可救大抵皆寶貓悞之耳吾願蓄貓者宜樸子是求家道受益非淺其都會來者雖體偉毛澤繫鈴拖綵豈皆爲可寶哉既悞慎勿爲再誤也

漢按三復斯篇則觸景傷懷不覺欲痛哭流涕或曰才拙而志誠於事或有補救之功若樸子者庶乎近焉

相傳一巨貓驕而怯一日忽得死鼠於盎中既鳴且躍若自詡其能忽有大鼠羣然過其前則巨貓遂伏而不敢動是亦寶貓之一流歟 王仲弁識

漢按甌諺有云瞎貓撞着死鼠意外之遇然有一世爲瞎貓而不遇死鼠者則茲巨貓猶爲多幸呵呵黃薰仁孝廉云昔有人饋先君洋貓一頭重十餘觔狀極雄偉人咸羨爲駿物始則鼠亦稍知斂跡豈知此貓性貪而懶日則竊飲瓶中酒夜則醺醺然卧鼠欺其無能擾亂尤甚衆皆惡棄之呼爲怪畜時余叔適得一貓三足者其後一足僅有上腿

而無下爪每呼食則跳躍難前審其狀似斷不能
捕鼠但鼠聞其聲莫不遠遁較諸洋貓外強中乾
賢不肖爲何如余以晉郤克唐裴叔度相傳皆跛
一足其建功立業何嘗不赫烈耶蓋人不可以貌
相余謂獸亦然

洋貓說

漢接近傳一官惟耽麴蘖不視事人皆呼爲醉貓
或以爲詰則曰我尚廉無患也殊不知權已旁落
下人竊美威福其害尤甚於自作孽也自古故重
廉明若昏而不明雖廉何補



